

Gregorius P. P. XVI.

Dilecte Fili Religiose Vir salutem et Apostolicam Benedictionem. Non mediocri quidem lætitiâ tuâ Nos affecerunt Litteræ Kalendis Decembris superiore anno datæ, atque intimo pietatis, et obsequii sensu conscriptæ. Ex illis enim accepimus ad multa et clarissima egregiæ religionis monumenta Carissimi in Christo Filii nostri Ferdinandi Austria Imperatoris Hungariæ Regis Apostolici, ac Bohemiæ Regis. Illustris illud quoque accepisse, ut ipse pientissimus Princeps singulari benevolentia Benedictinum Ordinem prosequens Tibi significaverit se vel maxime optare, ut Religiosa tua Familia in Monasterium Canonorum Regularium S. Augustini Griesæ ad Boicum in Tirolensi Comitatu ac Tridentina Diocesi situm transferatur. Quæ eximia religiosissimi Principis erga Benedictinum Ordinem beneficentia summam cordi nostro consolationem attulit. Etenim acerbissimas ejusdem Ordinis in nonnullis Helvetiæ Pagis acerbitates diu multumque dolentes, nunc insigni inclyti illius Principis munificentia novum Ordini ipsi domicilium, ac sedem præberi conspicimus, quo in adversis Helvetiæ rebus confugere possit. Cum autem ob plurimas, gravissimasque causas in ipsis tuis Litteris expositas nihil deliberandum existimaveris, antequam Nos accuratissime certiores faceres, nostramque sententiam cognosceres, tum vehementer a Nobis efflagitasti, ut indicare vellemus quid Tibi, in hac re, Dilecte Fili, esset peragerendum. Nos vero, ut ejusmodi negotium quam consultissime ageretur, illud peculiari Venerabilium Fratrum nostrorum S. R. E. Cardinalium Congregationi examinandum commisimus. Itaque auditis consiliis, acceptisque suffragiis eorundem Venerabilium Fratrum nostrorum, ac re omni a Nobis serio perpensa, Tibi, Dilecte Fili, significamus commemoratum Monasterium Canonorum Regularium S. Augustini Griesæ a Te excipi posse sub titulo tamen Prioratus, ac tamquam Monasterium pro tironibus instituendis, ut Religiosa tua Familia iis idoneis, selectisque monachis vigeat, et floreat, qui in decedentium locum suffici possint. Tibi autem eodem in casu erit innovanda de

claratio ad Abbatia Murensis jura sarta tecta tuenda. Atque illud in primis studio quam licet maximo, et omni vigilantia cures oportet, ut in novo monasterio Monachi eo sint numero, iisque dotibus praestent, ut memores vocationis eorum, ac virtutum ornatu fulgentes tum regularem disciplinam, tum communem vitam in exemplum religiosissime servare studeant. Jam vero postquam ea omnia fuerint expedita, quae ad hoc negotium conficiendum pertinent, Tuum erit, Dilecte Fili, hanc Apostolicam Sedem iterum adire, quo de hujusmodi Monasterii ad tuum jus translatione ceterisque rem ipsam spectantibus debitam, atque opportunam sanctionem consequi valeas. Denique praecipuam nostram erga Te caritatem denuo testamur, et confirmamus, ac caelestium omnium munerum auspiciem Apostolicam Benedictionem Tibi ipsi, Dilecte Fili, tuisque Monachis peramanter impertimur.

Datum Romae apud S. Mariam Majorem die 7. Septembris an: 1844.
Pontificatus Nostri Anno Decimoquarto

Ingeny PP. XVI